

nostri esser stà pocho, e di qui si provederà gaiardamente. *Item*, che ozi li a Pojana hano consultato col governador, e terminato per la comodità di strami e logiamenti uniti redursi a quelli lochi vicini a Barbarano, per poter redrizar e dar danari a queste gente e refrescarle, poi andar di longo sopra l'Adexe e più avanti, secondo le occorrentie. La note passata francesi hanno alloggiato a Valezo, e doveano andar alloggiar questa note che viene a Peschiera, dove si dice dover ussir certe gente di Verona per andar a unirse con quelle è a Peschiera e andarsene in brexana. *Tamen* è stà dito per uno homo d'arme venuto da quelle bande: come venere li nostri comenzorno a batere el castello di Brexa, che fo a di 14, e da poi batuto un gran pezzo cessorono in modo che indicava el castello esser reso. Conclude, che non manchando da li principali sussidii di danari, farano etc. *Item*, el signor Frachasso eri zonse qui; l'ha carezato et è stà ben visto da tutti. Et in fine dize, si spagnoli procederano, le cosse nostre anderano bene.

270* *Di sier Matio Sanudo pagador, vidi letere date in Montagnana, a di 14, hore 4 di note.* Come li muli soi è zonti, et à perso la casseta di scritture con qualche busara dentro. Idio lo ispirò a meter tute le bolete in li forzieri. Scrive aver perso il trapontin con tutti li fornimenti di leto, scapolà solum la coltra; ha perso tutte le massarie di cucina etc., et doi tapeti: si credeva haver major bota. Questa sera dice aver auto letere dil provedador Griti di Brexa. Si duol molto di tutti ch'è stati tardi a mandarli l'artelaria, et a hore 4 a di 12 recevete dita artelaria. I nemici sono andati a la volta di Peschiera, e à cavato parte di le zente di Verona per ingrossarse. Sono lanze 700, fanti 3000, senza quelli di Verona. Il danno à ricevuto nostri è stato da fanti 170 tra presi e morti; ben parecchi feriti che al continuo va zonzando e assai svalisati; homeni d'arme 18 tra prexi e morti, fra li altri el conte Guido Rangon; cari assai con robe di più di ducati 10 milia, ma el forzo biave e vituarie, doi falconeti e uno canon di 20. Eri li cavali lizieri di Verona corseno fino a Lonigo, e trovano parecchi cari con robe et li hano menati via e fato butino. El signor Frachasso è zonto qui ozi a hore 22. Li par uno saputo homo; à voluto el tuto li riconfi come passò el fato, e stà con desiderio dil zonzer di stratioti di el Friul che vieneno, e vuol ussir in persona e andar in campagna. El signor governador è al ponte di Barbaran; lo exercito è sparto e si va redunando qui, e le zente d'arme fo lassate a la guardia di el ponte, et le fantarie e fanti che vien

al continuo zonzando svalisati. El colateral se dice è andato fino a Padoa con dir siamo roti e frachassati, tuto el paese è in fuga, e si venisse ogni pocho di zente ne faria retirar fino in Padoa. *Item*, scrive, lui è con la febre.

Dil dito ivi, a di 15, hore 4. Si duol non poter mandar el suo mensual, per esser el so rasonato in Brexa e non pol. *Item*, il provedador li ha dà cargo di spazar le spie. *Item*, per più presoni fuziti e per spie, si ha il campo inimico esser zonto eri a mezzo zorno a Valezo, e nel passar, li nostri cavali lizieri è in Brexa, li à dato una streta ne le coaze. Diti presoni judica si habi auto el castel di Brexa, perchè tuta la note avanti i senti tirà, et eri da mattina, e poi cessò, e per questo judichano; ma lui non crede e potria esser aver cessato per esser a parlamento. *Item*, eri a mezzo zorno francesi si parti di Valezo e andava a Peschiera, e li dovea aspetar le zente è in Verona, le qual ha, per spie, saranno la mità di quelle è in Verona che dieno ussir, che potrà esser de fanti 1200, cavali in tutto 600. Dito exercito sarà da lanze 900, fanti 7000 almen, e in Lombardia se reduceva zente assai, e fato le proclame voler andar a destruction de brexani e bergamaschi, con amazar li puti in cuna etc. Scrive d'esser stato ozi col provedador Capelo a Poiana a parlar al governador. Le zente è quasi redute; ma in questi alozamenti non poleno star per non vi esser bocon di strame, e fo concluso di ritirarsi a Barbaran e quelli contorni. Lui era di contraria opinion e volea esso pagador passar l'Adexe e andar ad alozar nel paexe de i nimiei per aver el strame e per dar favor a le cosse di Brexa, e tuti quasi si hano aderito a la sua opinion, e spera di breve si buterà il ponte su l'Adexe. Si aspetta con desiderio zonzi le zente è in Friul; che Idio presto le mandi.

È da saper: in questa matina il colateral fo per aver audentia in Colegio, et non fo voluto darla perchè è stà causa di meter in fuga tutto il paexe maxime Padoa, che li rectori la note stetenno in piedi, e sier Nicolò da Prioli podestà cavalehò atorno la terra ponendo guardie a le porte, e l'capitano rimase a guarda di la piazza. Era mal che da zercha 35 cittadini padoani, di quelli si apresentavano a la bolla, per deliberation dil Consejo di X erano stà rimandati in Padoa, e a custodia di Padoa Maldonato Spagnol con fanti... e Nicolò da Cataro con..., in Castello Brazo con 30, in la Saracinescha è hora castelan sier Hironimo Malipiero fo provedador al sal, qu. sier Francesco, in locho di sier Alexandro suo fradello è amalato.